

Plentzian, Bizkaiko Foru Diputazioaren “Aterpetxea”-n, egin du Euskaltzaindiak hileroko bere bilera 1987ko urtarrilaren 31an. Goizeko hamaika t'erdietan bildu dira: L. Villasante burua, J. Haritschelhar buruordea, P. Altuna, A. Irigoyen, E. Knörr, F. Krutwig, J. San Martin eta J. M. Satrustegi, euskaltzainak; J. A. Arana Bibliotekariordea, J. L. Lizundia idazkariordea eta J. J. Zearreta ekonomi eragilea, urgazleak, J. M. Satrustegi idazkari dela.

Bezperako Jardunaldi saioetan egon ziren P. Charritton eta J. Gorostiaga, euskaltzainak, hala nola L. M. Mugika urgazlea ere.

Ezin etorria adierazi dute, J. Hiriart-Urruty, J. L. Davant, E. Larre eta P. Larzabal jaunek.

Batzar honen aurretik goizean egindako Jardunaldietako bilkuran zeuden, Miren Azkarate, R. Badiola, P. Goenaga, P. Uribarren eta M. Zalbide, urgazleak.

Ohi den eran hasi da batzarrea.

Abenduko batzar-agiria onartu da.

Eskuarteko gaiak

Complutense Unibertsitateak J. M. Barandiaran “Doctor Honoris Causa” izendatu duela esan zaie batzartuei, eta Euskaltzaindiaren izenean telegrama bat bidali zitzaiola Madrileraz zorianak emanez.

Kongresu eta kultur batzarretara joan ahal izateko Eusko Jaurlaritzak eskaintzen dituen diru-laguntzen berri igorri du J. M. Aranberri jaunak.

Asturiasko Hizkuntz Akademiak bere XIII.Kongresurako Euskaltzaindiaren zenbait zehaztasun eskatu ditu. Horrelako beste aurkezpen batzutarako egin txostenen laburpena bidaliko da.

Galego eta portugeraren Nazioarteko II.Kongresurako gomita hartu da.

ASEPEIO-k egindako hiztegiaren ale bat jaso da. Bibliotekariordeak erantzungo die.

J. L. Lizundiak 1986. urtean Euskaltzaindiko batzarreeta etorritako en zerrenda banatu du.

Abizenak euskal grafiaz idazteari buruz Tolosako Udalak aldatutako agiri baten berri eman da. Grafiaren arazo hutsa ez baino, norberaren jatorriarekin zerikusia duela eta, kontuz ibili beharra dagoela beste maila batzutan sort ditzakeen istiluengatik, aipatu da.

Nafarroan Antsoingo Kontseilutik hartutako galderari erantzunez, 'Veintena' / *Hogeikuna*, eta 'Junta de Veintena' / *Hogeikun batzordea* itzuliz erantzun zaiela, esan du Nafarroako ordezkariak. Era berean, 'Oncena' / *Hamaikuna*, eta 'Quince-na' / *Hamaboskuna* esatea zilegi litzateke.

Nafarroako Gobernuak izen euskalduna duten herrien euskal grafia eskatuko diola Euskaltzaindiari, jakinerazi du J. M. Satrustegik. Elkarrekin izan duten bilera batean finkatu dituzte erizpideak. Euskararen legeak dioena bete nahi omen du horrela Gobernuak.

Josep Vicens Foix kataluniar olerkariaren heriotzea dela eta 'Institut d'Estudis Catalans' elkargoari doluminak agertzea onartu da.

Intzako Damaso aita zenaren jarlekua betetzeko hautagaien izenak aurkezteko epea datorren batzarrean amaitzen dela, aditzera eman du euskaltzainburuak.

Jardunaldien berri

Etxe honetan bertan, Lexikologi Erizpideak Finkatzeko V. Jardunaldiak egin dira atzo egun osoko eta gaur goizeko saioetan. Gaiaren garrantzia, orain arte emandako urratsak eta eman nahi zaion bultzada, aipatu ditu. L. Villasantek sarraera txostenean.

Mikel Zalbideren ezin etorria adierazi ondoren, Miren Azkaratek irakurri ditu hark eztabaidarako prestatutako txostenak. "Sinbolismo fonetiko eta hots-tarduraz sorturiko hitzarteak" izenekoarekin eman zaio hasiera.

Tomas Uribeetxebarriak beste alde batetik begiratu, onomatopeia eta izena bi gauza direla, zioen bere txostenean. Hizkuntza mintzatuan ematen da hura eta izenera iritsiko balitz hitz konposatuz har daitekeela besterik gabe.

Lourdes Otaegik semantikan oinarritutako ohar eta agerpen batzu egin ditu bere lanean.

Irakurritako beste txostenen gaiak hauek izan dira: "Bikoiztapenak". "Dvandva-elkarteak". "*Astaputz* moduko hitz-elkarteak", eta "*Peru Abarka* elkarte motak". Denak M. Zalbidek gertatuak.

A. Irigoyenek Beloken egindako oharrekin batera beste agerpen batzuez taxututako txostena irakurri du. Haste hastetik aditzera eman duenez, zerrenda horietako hainbat eta hainbat gai, hiztegian baino hobeto gramatikan agertzekoak omen dira. Gaurko premia gorria dela eta erantzunaren zain daudenei begira bakarrik amore emango lukeela, eta zerrenda beharrezkoeneta mugatuz.

Eritzi asko agertu dira, esan bezala eztabaidarako prestatuak ziren txosten hauen irakurketaren ondoren. Jardunaldien agirian emango da denen berri.

Txostena

Larraun-Lekunberriko Jardunaldietan, urriaren 24 eta 25ean, Hiztegitzinta batzordeak *Euskal Lexiko Berrikuntzaz* egindako lanean oinarriturik, P. Altuna, I. Sarasola eta M. Zalbide hirukoteak Euskaltzaindiak eskatutako erabakigaiak aurkeztu zuten azaroaren 30eko batzarrean. Orduko oharrak jaso ondoren azken proposamena aurkeztu da gaur, Euskaltzaindiak erabakia har dezan. Izenburua: "Lexiko-berrikuntza eta bilketa-lana bideratzea". Atal nagusi hauek ditu txostenak: 1) Abiaburuak. 2) Oinarritzko erizpideak, eta 3) Ihardupidea. Azken puntu honetan, zer, nola eta nork bildu, mugatzen da, hala nola lanaren epea. Euskaltzaindiari lanaren gidaritza besterik ez zaio eskatzen, taldeek beren aldetik lortu beharko dutelarik finantziabidea.

Horrela onartu da, Euskaltzaindiak bere arduradunak izendatzekotan.

Eta besterik gabe amaitu da batzarrea.

Fr. Luis Villasante,
Euskaltzainburua

Jose M. Satrustegi,
Idazkaria